

Eloquentia fortitudine præstantior.



Arcum leua tenet, rigidam fert dextera clauam,
 Contegit & Nemees corpora nuda leo.
 Herculis hæc igitur facies? non conuenit illud
 Quòd uetus & senio tempora cana gerit.
 Quid quod lingua illi leuibus traiecta cathenis,
 Queis fissa facili allicit aure uiros?
 An ne quòd Alciden lingua non robore Galli
 Præstantem populis iura dedisse ferunt?
 Cedunt arma togæ, & quamuis durissima corda
 Eloquio pollens ad sua uota trahit.